

Kyā Tū Tandurust Honā Chāhtā Hai?



kyā tū tandurust honā chāhtā hai?

Do You Want to be Healed?

by Bakhtullah

[A0, Khud Dekh Lo 10]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of
Katamaheen <https://pixabay.com/illustrations/grass-vegetation-green-easter-soil-7840326/>; R. Gunther
<https://freebibleimages.org/illustrations/rg-lame-man/>

Bible quotations are from UGV.

for enquiries or to request more copies:

askandanswer786@gmail.com

Fahrist

Kyā Tū Tandurust Honā Chāhtā Hai?	2
Nuktāchīnī kā Mazā	3
Phir Gunāh na Karnā	4
Bāp kī Marzī Sab Kuchh Hai	6
Ḳhudāwand Hameñ Abadī Zindagī Detā Hai	8
Injīl, Yūhannā 5:1-29	10

Yarūshalam mein ek mashhūr hauz banām Bait-hasdā thā. Is hauz ke khandarāt āj tak dekhe jā sakte haiñ. Hauz pāñch baḡe barāmdoñ se ghirā huā thā. Un mein be-shumār andhe, langaḡe aur maflūj paḡe rahte the.

► *Itne māzūr log wahāñ kyoñ jamā rahte the?*

Kabhī-kabhār hauz kā pāñi thoḡi der ke lie hilne lagtā thā. Us waqt jo bhī pahle pāñi mein jātā use shafā milti thī.

Ek din Ḳhudāwand Īsā wahāñ se guzrā. Us ne ek ādmī ko farsh par paḡā dekhā jo 38 sāl se māzūr thā.

Ab soch leñ: Wahāñ to bhīḡ hī bhīḡ thī. Phir bhī Īsā Masīh ne ek hī ādmī par nigāh ḡālī aur usī par rahm kiyā.

► *Kyoñ? Us ne dūsroñ ko shafā kyoñ na dī?*

Wuh jāntā thā ki yih ādmī bahut sālon se mazīr hai. Phir bhī yih ek rāz hai ki Ḳhudā ek ko shafā detā hai aur dūsre ko nahīn. Masīh ne pūchhā,

Kyā Tū Tandurust Honā Chāhtā Hai?

► *Yih kaisā sawāl hai? Kaun tandurust nahīn honā chāhtā? Īsā Masīh yih kyon pūchhtā hai?*

Ḳhudāwand Īsā kabhī zabardastī nahīn kartā. Zarūrī hai ki ham uskī madad qabūl karen. Ki ham use apnī zindagī meñ āne den. Ham inkār to kar sakte haiñ.

► *Āj Ḳhudāwand Īsā ham sab se pūchh rahā hai ki kyā tū tandurust honā chāhtā hai? Ham kyā jawāb denge? Kyā ham apnā muñh pherkar andhere meñ rahnā pasand karenge? Yā ham us ke nūr meñ ākar tandurust ho jāenge?*

Wuh ādmī bolā, “Ḳhudāwand, yih mushkil hai. Merā koī sāthī nahīn jo mujhe uṭhākar pānī meñ jab use hilāyā jātā hai le jāe. Islie mere wahān pahuñchne meñ itnī der lag jātī hai ki koī aur mujh se pahle pānī meñ utar jātā hai.”

Īsā Masīh ne kahā, “Uṭh, apnā bistar uṭhākar chal-phir!”

Wuh ādmī ekdam ṭhīk ho gayā. Us ne apnā bistar uṭhāyā aur chalne-phirne lagā.

Jo hukm Ḳhudāwand Īsā detā hai wuh hameshā pūrā ho jātā hai.

Nuktāchīnī kā Mazā

Kuchh logon ne dekhā ki yih ādmī phir rahā hai to saḳht nārāz hue. Kahne lage, “Āj Sabat kā din hai. Āj bistar uṭhānā manā hai.”

Sabat, Hafte kā din thā. Ḳhudā ne Mūsā nabī ko farmāyā thā ki Sabat ke din kām-kāj mat karnā. Maqsad yih thā ki logon ko is din naukarī se chhuṭṭī mile. Magar bād meñ Yahūdī ustādon ne be-shumār aur pābandiyān lagāi thīn. Bistar uṭhākar ghar le jānā bhī manā thā. Ab yih be-chārā kyā kare? Use to ghar pahuñchnā hī pahuñchnā thā.

► *Kyā in logon ko mazīr kī fikr thī?*

In logoñ ko parwā hī nahīn thī ki is ādmī ko shafā milī hai, ki itnā baṛā mojizā huā hai. Kitnā afsos! Yih kaṭṭar log mazhab ke nām meñ bahut saḁht ho gae the. Mazhab kā kyā fāydā agar ham Ḵhudā se dūr hoñ? Agar ek dūsre se muhabbat na ho?

► *Kyā āp aise logoñ se wāqif haiñ?*

Ādmī ghabrā gayā. Wuh bolā, “Ek ādmī ne mujhe shafā dī. Usī ne mujhe batāyā, ‘Apnā bistar uṭhākar chal-phir.’”

Unhoñ ne sawāl kiyā, “Wuh kaun hai jis ne tujhe yih kuchh batāyā?” Lekin us ādmī ko mālūm na thā, kyonki Īsā Masīh hujūm meñ ḡhāyb ho gayā thā.

Phir Gunāh na Karnā

Bād meñ Īsā Masīh use Baitul-muqaddas meñ milā. Us ne kahā, “Ab tū bahāl ho gayā hai. Phir gunāh na karnā, aisā na ho ki terā hāl pahle se bhī badtar ho jāe.”

Kamāl hai. Māzūr kī hālat to ṭhīk ho gayā thā. Lekin Ḳhudāwand insān ke dil meñ dekhtā hai. Use mālūm thā ki bīmārī kī zahrīlī jaṛ bāqī rah gāī thī. Yih jaṛ ab tak ḵhatm nahīn huī thī.

◀ *Jaṛ kyā thī?*

Gunāh. Ham nahīn jānte ki us ne kyā gunāh kiyā thā. Magar Masīh ko mālūm thā. Har bīmārī to kisī ḵhās gunāh kī wajah se nahīn hotī. Lekin Masīh jāntā thā ki is marz ke pīchhe ek sanjīdā gunāh hai.

► *So Ḳhudāwand Īsā kā ḵhās dhyān kis chīz par thī?*

Gunāh par. Ādmī kī rūhānī hālat par.

Ḳhudāwand Īsā chāhtā hai ki hamārī andarūnī hālat bahāl ho jāe. Is duniyā meñ rahte hue hamārī hālat nāzūk rahtī hai. Ham bīmār hoñ na hoñ, baṛī bāt yih hai ki ham phir gunāh na karen. Ki ham Ḳhudāwand ke qadamoñ meñ baiṭhe raheñ. Uskī bāteñ sunte raheñ. Us ke pīchhe chalte raheñ. Tab hī ham andar se bahāl ho jāeñge.

► *Āpkā kyā ḵhyāl hai ki us ādmī ne jawāb meñ kyā kiyā?*

Wuh kambakht sīdhe Yahūdī buzurgoñ ke pās gayā aur unheñ ittalā dī, “Īsā ne mujhe shafā dī.” Yih sunkar wuh Ḳhudāwand Īsā ko satāne lage.

Ḳhudāwand Īsā ne us ādmī ko na sirf shafā dī thī. Us ne use apne gunāhoñ se bahāl hone kā mauqā bhī diyā thā.

► *Phir bhī us ne kyā kiyā?*

Us ne us ke rahm ko haqīr jānā.

► *Jab Ḳhudāwand Īsā ham se hamkalām hotā hai to merā kyā jawāb hai? Āpkā kyā jawāb hai?*

Bāp kī Marzī Sab Kuchh Hai

► *Jab buzurg Ḳhudāwand ko satāne lage to us ne jawāb meñ kyā kahā?*

Us ne farmāyā, “Merā Bāp āj tak kām kartā āyā hai, aur main bhī aisā kartā hūñ.”

► *Is se wuh kyā kahnā chāhtā hai?*

Ḳhudā Bāp har waqt kām kartā hai. Lamhā balamhā wuh duniyā kī har chīz qāym rakhtā hai warnā ham sab ekdam khātm ho jāte. Yoñ uskā kām Sabat ke din bhī jāri rahtā hai. Ḳhudāwand Īsā

farmātā hai ki isī lie merā kām Sabat ke din bhī jāri rahtā hai. Main̄ Ḳhudā kā Farzand hūn̄ islie zāhir hai ki main̄ rozānā uskī marzī pūrī kartā hūn̄.

Yahūdī buzurg aur zyādā biphar gae.

► *Kyon?*

Un ke nazdik us ne Allāh ko apnā Bāp kahkar apne āpko Allāh ke barābar ṭhahrāyā thā.

► *Kaise?*

Us ne farmāyā thā, jis tarah Ḳhudā Bāp Sabat ke din kām kartā hai usī tarah main̄ bhī kartā hūn̄.

Lekin Īsā Masīh ek aur bāt kahnā chāhtā hai. Yih ki main̄ pūre taur se Bāp kī marzī kartā hūn̄. Main̄ apnī marzī se kuchh nahīn̄ kartā. Usī kī marzī thī ki main̄ Sabat ke din us ādmī ko shafā dūn̄. Islie main̄ne use shafā dī. Apnī marzī se nahīn̄. Usī kī marzī se.

► *Hamārā is se kyā wāstā hai?*

Ḳhudāwand Hameñ Abadī Zindagī Detā Hai

Masīh ne buzurgoñ se kahā,

Jis tarah Bāp murdoñ ko zindā kartā hai usī tarah Farzand bhī jinheñ chāhtā hai zindā kar detā hai.

(Injīl, Yūhannā 5:21)

Aur yih zindagī isī duniyā meñ mil saktī hai.

Masīh kī yih zindagī anāj ke ek dāne kī tarah hai.

Yih dānā dekhne meñ māmūlī-sā lagtā hai.

► *Ise zamīn meñ dabā diyā to kyā hotā hai?*

Bīj gal jātā hai.

► *Kyā gal jāne se uskī tāqat aur zindagī ḳhatm ho jātī hai?*

Nahīn. Ek din zamīn se paudhā ug ātā hai jo baḳhtā baḳhtā phal lātā hai.

► *Main is se kyā kahnā chāhtā hūn?*

Us māmūlī se bīj meñ paudhe kī pūrī tāqat aur zindagī samāī huī hai. Bīj gal jātā hai magar uskī yih tāqat aur zindagī ḳhatm nahīn hotī. Us zindagī se ek shāndār paudhā paidā huā. Bilkul

isī tarah wuh zindagī hai jo Masīh hameñ detā hai. Jab ham īmān lāte haiñ to hamāre andar abadī zindagī kā bīj boyā jātā hai. Ek din hamārā jism to gal jāegā. Magar ham ḳhud ḳhatm nahīn hoñge. Hamāre andar kī yih abadī zindagī hameñ Ḳhudā kī nazar meñ mañzūr karāegī. Tab hameñ ek nayā jism milegā jo is duniyāwī jism se kahīn behtar hogā. Aise shaḳhs ke bāre meñ Ḳhudāwand Masīh farmātā hai,

Use mujrim nahīn ṭhahrāyā jāegā
balki wuh maut kī girift se nikalkar
zindagī meñ dāḳhil ho gayā hai.

(Injīl, Yūhannā 5:24)

► *Kyā āpke andar abadī zindagī kā yih bīj hai?*

Injil, Yūhannā 5:1-29

Kuchh der ke bād Īsā kisī Yahūdī id ke mauqe par Yarūshalam gayā. Shahr meñ ek hauz thā jis kā nām Arāmī zabān meñ Bait-hasdā thā. Us ke pāñch baṛe barāmdē the aur wuh shahr ke us darwāze ke qarīb thā jis kā nām ‘Bheṛon kā Darwāzā’ hai. In barāmdon meñ be-shumār mazīr log paṛe rahte the. Yih andhe, langaṛe aur maflūj pānī ke hilne ke intazār meñ rahte the. [Kyonki gāhe bagāhe Rab kā farishtā utarkar pānī ko hilā detā thā. Jo bhī us waqt us meñ pahle dākḥil ho jātā use shafā mil jātī thī khāh uskī bīmārī koī bhī kyon na hotī.] Marīzon meñ se ek ādmī 38 sāl se mazīr thā. Jab Īsā ne use wahāñ paṛā dekhā aur use mālūm huā ki yih itnī der se is hālat meñ hai to us ne pūchhā, “Kyā tū tandurust honā chāhtā hai?”

Us ne jawāb diyā, “Ḳhudāwand, yih mushkil hai. Merā koī sāthī nahīn jo mujhe uṭhākar pānī meñ jab use hilāyā jātā hai le jāe. Islie mere wahān pahuñchne meñ itnī der lag jātī hai ki koī aur mujh se pahle pānī meñ utar jātā hai.”

Īsā ne kahā, “Uṭh, apnā bistar uṭhākar chal-phir!” Wuh ādmī fauran bahāl ho gayā. Us ne apnā bistar uṭhāyā aur chalne-phirne lagā.

Yih wāqiyā Sabat ke din huā. Islie Yahūdiyōñ ne shafāyāb ādmī ko batāyā, “Āj Sabat kā din hai. Āj bistar uṭhānā manā hai.”

Lekin us ne jawāb diyā, “Jis ādmī ne mujhe shafā dī us ne mujhe batāyā, ‘Apnā bistar uṭhākar chal-phir.’”

Unhoñ ne sawāl kiyā, “Wuh kaun hai jis ne tujhe yih kuchh batāyā?” Lekin shafāyāb ādmī ko mālūm na thā, kyoñki Īsā hujūm ke sabab se chupke se wahān se chalā gayā thā.

Bād meñ Īsā use Baitul-muqaddas meñ milā. Us ne kahā, “Ab tū bahāl ho gayā hai. Phir gunāh na karnā, aisā na ho ki terā hāl pahle se bhī badtar ho jāe.”

Us ādmī ne use chhoṛkar Yahūdiyon ko ittalā dī, “Īsā ne mujhe shafā dī.” Is par Yahūdī us ko satāne lage, kyoñki us ne us ādmī ko Sabat ke din bahāl kiyā thā. Lekin Īsā ne unheñ jawāb diyā, “Merā Bāp āj tak kām kartā āyā hai, aur main bhī aisā kartā hūñ.”

Yih sunkar Yahūdī use qatl karne kī mazīd koshish karne lage, kyoñki us ne na sirf Sabat ke din ko mansūkh qarār diyā thā balki Allāh ko apnā Bāp kahkar apne āpko Allāh ke barābar ṭhahrāyā thā.

Īsā ne unheñ jawāb diyā, “Main tum ko sach batātā hūñ ki Farzand apnī marzī se kuchh nahīn kar saktā. Wuh sirf wuh kuchh kartā hai jo wuh Bāp ko karte dekhtā hai. Jo kuchh Bāp kartā hai wuhī Farzand bhī kartā hai, kyoñki

Bāp Farzand ko pyār kartā aur use sab kuchh dikhātā hai jo wuh ḳhud kartā hai. Hāñ, wuh Farzand ko in se bhī azīm kām dikhāegā. Phir tum aur bhī zyādā hairatzadā hoge. Kyoñki jis tarah Bāp murdoñ ko zindā kartā hai usī tarah Farzand bhī jinheñ chāhtā hai zindā kar detā hai. Aur Bāp kisī kī bhī adālat nahīn kartā balki us ne adālat kā pūrā intazām Farzand ke supurd kar diyā hai tāki sab usī tarah Farzand kī izzat karenñ jis tarah wuh Bāp kī izzat karte haiñ. Jo Farzand kī izzat nahīn kartā wuh Bāp kī bhī izzat nahīn kartā jis ne use bhejā hai.

Mainñ tum ko sach batātā hūñ, jo bhī merī bāt sunkar us par īmān lātā hai jis ne mujhe bhejā hai abadī zindagī uskī hai. Use mujrim nahīn ṭhahrāyā jāegā balki wuh maut kī girift se nikalkar zindagī meñ dāḳhil ho gayā hai. Mainñ tum ko sach batātā hūñ ki ek waqt āne wālā hai balki ā chukā hai jab murde Allāh ke Farzand kī āwāz suneñge. Aur jitne suneñge

wuh zindā ho jāēnge. Kyoṅki jis tarah Bāp zindagī kā maṅbā hai usī tarah us ne apne Farzand ko zindagī kā maṅbā banā diyā hai. Sāth sāth us ne use adālat karne kā iḳhtiyār bhī de diyā hai, kyoṅki wuh Ibn-e-Ādam hai. Yih sunkar tājjub na karo kyoṅki ek waqt ā rahā hai jab tamām murde uskī āwāz sunkar qabroṅ meṅ se nikal āēnge. Jinhoṅ ne nek kām kiyā wuh jī uṭhkar zindagī pāēnge jabki jinhoṅ ne burā kām kiyā wuh jī to uṭhēnge lekin un kī adālat kī jāegī.